





490-1887

Cc 4-c. 22



Digitized by the Internet Archive
in 2014

<https://archive.org/details/b21452581>



DISSERTATIO MEDICO-CHIRURGICA
INAUGURALIS
DE PROSTATA TUMIDA.

THE HISTORY OF
THE ENGLISH PEOPLE

KING HENRY VIII.
AND
CATHERINE OF ARAGON.

BY
THOMAS BROWNE,
M.D.
LONDON:
PRINTED FOR THE AUTHOR,
1750.

THIS EDITION IS PUBLISHED BY
JOHN DODS, OF NEWCASTLE UPON TYNE,

FOR THE AUTHOR, AND FOR SALE

AT THE BOOKSTALL IN THE NEWCASTLE

BY JOHN DODS, NEWCASTLE UPON TYNE.

10

Dr. John Brown

"With the respectful regards
of his obliged Pupil

The Author

DISSERTATIO MEDICO-CHIRURGICA
INAUGURALIS

QUEDAM,

DE PROSTATA TUMIDA
COMPLECTENS ;

QUAM,

ANNUENTE SUMMO NUMINE,

EX AUCTORITATE REVERENDI ADMODUM VIRI,

D. GEORGII BAIRD, SS. T. P.

ACADEMIÆ EDINBURGENÆ PRÆFECTI;

NECNON

AMPLISSIMI SENATUS ACADEMICI CONSENSU ET
NOBILISSIMÆ FACULTATIS MEDICÆ DECRETO;

Pro Gradu Doctoris,

SUMMISQUE IN MEDICINA HONORIBUS AC PRIVILEGIIS
RITE ET LEGITIME CONSEQUENDIS ;

ERUDITORUM EXAMINI SUBJICIT

JACOBUS BRUCE,

Scotus,

CHIRURGUS.

Kalendis Augusti, horâ locoque solitis.

EDINBURGI :

EXCUDEBAT ALEX. SMELLIE,

ACADEMIÆ TYPOGRAPHUS.

1827.

VIRO EXIMIO,
JACOBO LAW,
DE ELVINGSTONE, ARMIGERO,
COLLEGII REG. CHIR. EDIN. SOCIO ;
NON MINUS OB VIRTUTES PRIVATAS
DILECTO,
QUAM OB MERITA IN ARTE SUA
HONORATO,
HOC TENTAMEN,
STUDIORUM ILLO DUCE SUSCEPTORUM
PRIMITIAS,
OBSERVANTIAE SUMMÆ, ANIMIQUE
GRATISSIMI, PIGNUS,
DEDICAT
AUCTOR.

DISSERTATIO MEDICO-CHIRURGICA

INAUGURALIS

QUAEDAM

DE PROSTATA TUMIDA

COMPLECTENS.

PROCÆMIUM.

GLANDULA PROSTATA variis ex causis, variisque
aetatis temporibus, amplificari possit; sed eam tan-
tum speciem amplificationis, cui nomen “ Scirrus
“ Prostatae” (quamvis fortasse parum rite) vulgo
imponitur, agere in animo est.

Hoc malum persaepe in senio incessit; notatu
tamen dignum est, id, a caeteris urinae organorum

vitiis discrete spectatum, cognitionem antiquiorum, ante tempora gnavi et perspicacis MORGAGNI, parum asseruisse videri. Hic vero aliquot hujus vitii exempla tradit;* historiamque symptomatum praegressorum, itemque eorum quae cada- vere inciso conspiciuntur, accuratam exponit.

PRIMA, autem, descriptio morbi perfecta proferatur a viro celeberrimo, JOANNE HUNTER†, qui signa propria, partibus sive lobulis hujuscet glandulae lateralibus, ob suam amplificationem, latera urethrae comprimentibus, et ejusdem meatum a fistulae quasi rotundae figura, ad fissuram arctam complanantibus, exitumque urinae ita impedientibus, inducenda, depingit. Postea de hac re talia refert :—

“ Besides this effect of the lateral parts swelling,
 “ a small portion of it, which lies behind the very
 “ beginning of the urethra, swells forwards like a
 “ point as it were, into the bladder, acting like a
 “ valve to the mouth of the urethra.”

* Morgagni de Causis et Sedibus Morborum, in sectione “ De Urinae Suppressione.”

† “ Hunter on the Venereal Disease.”

HAECCE projectura valvularis, tertio Prostatae lobulo amplificato, effici fertur a Domino EVERARDO HOME, Baronetto. Iste, enim, lobulus, a tergo finibus vasorum deferentium arcte deligatus, nihil ejus incremento ex adverso obstante, in vesicam necessario imminet. Dum ita amplificatur, membranam vesicae internam distendi, atque inflammatione, quae glandulae amplificationem effecit, eadem plecti, HOME nos certiores facit.

CAROLUS BELL,* hanc rem altius adhuc perscrutatus, hoc malum, actione vehementi duarum habenularum ex fibris musculosis constantium, multum exacerbari censet—quae quidem habenulae ab ostiis ureterum ad os vesicae versus descendunt, et, coeuntes, parti Prostatae inferiori et mediae adhaerent.

TALES isti musculi usus praestant, contractionem vesicae adjuvant, et simul ostia ureterum ocludunt, eorumque aditus per tunicas vesicae,

* " Medic.-Chirurg. Transactions, vol. iii."

fines eorundem pro gradu contractionis vesicae generalis detrahendo, obliquitatem servant.

VESICAE superficies, ubi istorum muscularorum conjunctionem interne obtagit, acerrima instruitur sentiendi facultate, quae propensionem solitam ad urinam reddendam ciet; et haec irritabilitas, morbo adacta, comitem habet muscularum actionem perpetuam, quae irritationem Glandulæ Prostatae insolitam non excitare nequit. Porro, quoniam haec irritabilitas proxime super lobulum tertium sedem habet, muscularique jam memorati eidem particulae quam arcte annexuntur, non fieri potest quin ejus incrementum ad vesicae cavum versus augeant.

SHAW,* autem, opinatur Glandulae Prostatae vitium, quod tumorem intra vesicam efficit, non semper amplificatione lobuli tertii, sed aliquando projectura partis glandulae ante istum lobulum sitae, in quam porro musculi ureterum praecipue inseruntur, induci.

* *Vide* "C. Bell's Surgical Observations, vol. x."

HOC malum *viris* tantum contingere posse in aprico est, et profecto raro ante annum aetatis quinquagesimum conspiciendum accidit; quamquam, enim, in longe junioribus haec glandula nonnunquam amplificatur, tamen incrementa ejusmodi, alicujus mali aliud symptomatica, existunt, et brevi post morbum principem sublatum evanescunt. Post aetatem, vero, quinquagenariam, multo saepius sese prodit in conspectum, paucique octogenariam attingunt quin hujus partis vitio plus minus laboraverint.

NEMINI ullius ordinis, praeceteris, aut pareit aut nocet; omnes, enim, cujusque generis ordinisque, pariter obnoxii sunt.

SI, tamen, viris illis HUNTER et DESAULT ulla fides est, crebrior est istis qui gonorrhœa saepius laborarunt.

HOMI, eos qui vitam intemperatam degerunt, Veneremque nimis coluerunt, obnoxiores censet.

WILSON,* homines etiam qui organa genitalia, minus quam voluit natura, exercuere, huic vitio procliviores esse ait; adjicit, autem, multos, qui vitam probam temperatamque egerunt, neque utrumlibet extreum appropinquarent, multum molestiae a Prostata amplificata fuisse expertos.

DE FABRICA USUQUE PROSTATÆ.

GLANDULA conglobata Prostata est, nucemque castaneam, tum quod molem, tum quod attinet figuram, insigniter refert. Latitudinem pollice paulo ampliorem, longitudinem parem, crassitudinem sémpollicis, pondusque quinque circiter drachmarum, habet.

PONE et infra Vesicam, et supra et ante Intestini Recti finem, angulum, ubi peritonaeum re-

* "Wilson on the male Urinary and Genital Organs."

flectitur, inter, et finem Intestini inferiorem, locum obtinet. Fundus ejus ad vesicam versus, et apex ad partem urethrae membranosam, spectat.

IN lobulos duos laterales dispescitur per quan-dam in centro fundi fossulam, proxime supra quam, partes imæ vasorum deferentium vesicu-larumque seminalium locantur, quarum ductus glandulam in centro fossulae transigere incipiunt, et exinde, partem inferiorem urethrae, ubi sub-stantia glandulæ cingitur, ineunt. Superficies glan-dulae posterior gibba est, et ad Rectum per telam cellulosam interpositam adhaeret. Superficies an-terior, quae per duos fere sui spatii trientes levi-ter cava est, per reliquam potius convexa, collo vesicæ initioque urethræ, huic autem maxime, arcte annexitur, eaque prope cingit. Per fasciam validam pubi etiam adhærescit.

INTER lobulos binos laterales, vesicam urinae, veruque montanum, pars ea glandulæ sita est, cui HOME nomen Lobuli Tertii imposuit; ita quidem ut in aspectu suo posteriori vesiculos seminales

vasaque deferentia habeat, membranaque collum vesicæ investiente obtegatur.

MULTUM abest ut haec pars glandulae, si modo sanae, longe emineat, et sæpe vix aut ne vix quidem conspici queat ; sed, amplificatione facta, sese sursum ad cavum versus vesicae, proxime pone urethrae initium, trudit.

HAEC projectura; vesica sese contrahente, simul cum urina depellitur, et valvulae vice, quod urethram attinet, functa, tam exitum urinae impedit, quam catheteri immittendo pertinaciter obstat.

GLANDULÆ ipsius substantia fabricae firmissimae et carneae, colorisque leucophaeo-rubri, est. Structura ex cellulis minimis constat ; unde oriuntur ductus quidam parvuli, qui inter se coëunt, adeo ut vasa aliquot, plerumque ab octo ad duodecim, in urethram per foraminula follicularia, circa veru montanum hiantia, constituant.

Usus Glandulae Prostatae verus parum adhuc pro comperto habetur. Humorem quendam co-

lore floris lactis praeditum, viscidumque, secernere videtur; qui quidem copia haud parva, dum partes impetu summo veneris excitantur, effusus, et pari tempore cum semine ejectus, alicui in opere gignendi usui verisimiliter inservit.

COPIA hujus humoris, in amplificatione Prostatae, solita multo major secernitur. Urinam equidem aegrotantis, per dies aliquot deinceps, ex hoc muco tenaci quasi solo fere constare vidi. Nec non viscidus admodum et tenax evadit; et quum in matula mersus fuerit, inde ad altitudinem pedis unius alteriusve, cohaesione tamen irrupta, in formam quasi funiculi trahi potest.

HUJUSMODI sedimentum in urina, sive a glandula sola, sive partim quoque a vesica ipsa proveniat, semper ubi illud viscus maxime irritabile est, copiosissimum appareat; urinaque ipsa, talibus in exemplis, graviter foetet, atque facile in putredinem abit.

DE SIGNIS.*

HOC malum in duo stadia distribui licet, quamquam tempus accuratum, quo alterum desinit, alterumque incipit, saepe parum plane conspici queat.

IN stadio priori sive incipiente, aeger de sensu obtuso et ingrato per perineum ad finem Recti, collumque vesicæ, cum frequente calore et pruritu glandis penis, conqueritur ; micturitione plectitur, sed parum uno quovis tempore excernit ; urina sæpe, post exercitationem insolitam præcipue, cruenta redditur. Quando lobulus tertius mole augescere incipit, ad cavum vesicæ versus eminet, membranamque hujus visceris internam imprimit, unde irritabilitas admodum intenditur, dolor sævus inter urinam reddendam sentitur, maxime dum guttulæ postremæ elabuntur, desideriumque amplius iningendi, postquam etiam vesica omnino vacua est, manet.

* Haud raro accidit ut in cadavere Prostatam maxime tumidam conspiciamus ; quanquam aeger per vitam nullam affectionem hujuscem generis questus fuerat.

DIUTURNITAS stadii prioris multum a gradu amplificationis hujusce lobuli pendebit. Si lobuli tantum laterales ampliantur, aut medius leviter solummodo afficitur, hoc stadium per annos aliquot perstare poterit, indiciis pedetentim ingravescientibus ; pars, autem, media haud multum augeri potest, quin exitui urinae pertinaciter obstat.

ID pro secundo duci queat stadio, ubi urina, omnibus simul stadii incipientis signis haud parum exacerbatis, prorsus supprimitur. Molestia, quam, in stadio priori, aeger quasi sensum ingratum obtusum depingebat, jam in dolorem vertitur obtusum et perpetuum, sensus acres jaculantes, subinde a glandula ad urethram, nonnunquam ad vesicam et ureteres tendentes, sibi comites adjunctos, habentem. Miser aegrotus ad urinam emittendam summo cum conamine, sed frustra, nititur ; membrana vesicae interna, lobulum eminentem obtegens, inflammatur, et, hac inflammatione cito per totam superficiem serpente, dolor multum intenditur, affectibusque spasmodicis colli vesicae trucissimis stipatur.

HOC stadium diu constare nequit, nisi ratio quaedam urinae educendae reperiatur. Hoc facto, sublevamine temporario aeger fruitur; at signa, saevitiâ nihil imminutâ, per intervalla recrudescent.

HAUD raro particulae lymphae coagulabilis e membrana mucosa eduntur, et interdum pus plene elaboratum in urina conspicitur. Inflammatio ad fibras musculosas vesicae serpens, quominus hae, uti in sanitate, sese relaxent, impedit; fasciculisque ipsis, ob motum crebrum et vehementem, in quem abripiuntur, amplioribus factis, amplitudo vesicae minuitur, dum crassitudo parietum augetur.

HAEC symptomata aliquando ingentem attin-
gunt vehementiam, dein sese remittunt; neque
raro accidit ut aliquis, postquam a morbo crucia-
tus trucissimos toleraverit, ac irritationi generali
jamjam succubitus visus sit, quietem denuo
paulatim, et haud parum otii, et, irritatione mi-
tescente, facultatem urinae excernendae recipiat, et
aliquamdiu ad solita et assueta negotia redire pos-

sit : At serius ocyus malum, cum omnibus suis angoribus, revertitur, miserque, tandem dolore perpetuo et irritatione irrupta penitus defatigatus, succumbit.

INTER morbi decursum, rigores saepe accedunt, qui indolem fere motuum convulsivorum interdum attinent, atque, uti par est, haud parva constitutionis universæ turbatio urget. Plerumque, irritatione augescente, copia urinæ parcior secernitur, et haec indicia cum statu alvi nexu arctissimo conjungi videntur ; hac, enim, astrictiore facta, symptomata maxima ex parte ingravescunt, et aliquando aspectum sibi magnopere formidolosum sumunt ; namque aeger in veternum somniculosum, delirio et nonnihil interdum fere comatis comitantibus, incidit.

EXEMPLUM quoddam ipse cognovi, ubi in talis soporem saepe incidebat aegrotus, et inibi per dies aliquot deinceps permanebat ; attamen, alvo plene soluta, et idonea urinae secretione restituta, omnes suas facultates recuperaverit.

ALIUD, adhuc, ab alvi conditione parum attente curata, malum proficiscens illud est, quod nempe sterlus per remoram induratum, aeger non nisi cum magno dolore et difficultate eliminare queat; quae quidem difficultas, capacitati partis recti glandulae morbosae adjacentis, hujus amplificatione per digitum ano immissum facile percipienda, imminutae debetur. Haec, quoque, amplificatio causa est tenesmi frequentis, sensusque quem sentit aeger, postquam alvum dejicit, quasi frustum stercoris adhuc ejiciendum, relinqueretur.

DE IIS QUÆ, CADAVERE PATEFACTO,
CONSPICIUNTUR.

QUUM in stadio incipiente morbi Prostata inquisitioni subjicitur, nil mutationis structurae, praeter amplificationem, oculis sese prodit. Sed postquam malum aliquantum fuerit provectum,

substantia glandulae incisae quasi firma sentitur, superficiesque secta albido-fuscum prae se fert colorem, septaque membranosa, per eam quoquoeversum tendentia, valde notabilia conspiciuntur.

GLANDULA, revera, omnem aspectum scirrhi ostendit ; ideoque morbus vernacule “ Scirrus of “ the Prostate” appellatus est. Haec, autem, amplificatio, quod duas res attinet, ab indole scirrhi communis insigniter discrepat ; *1mo*, Exempla sunt hujus morbi ad sanitatem producti. *2do*, Non in ulcerationem *sponte* abit. Exempla procul dubio acciderunt, ubi ulceratio incepit—imo haud parum provecta fuit ; haec autem perpaucia sunt, et, me saltem judice, usui violento et male instituto catheteris tribuenda.

GLANDULA plerumque latera versus maxime increvisse videtur ; aliquando incrementum aequaliter factum fuit, adeo ut corpori glandulae sua adhuc constet figura ; saepe, tamen, unum prae altero latere increvit, aut amplificatio hic quam illic major evasit, eo usque ut tractus urethrae obliquus reddatur.

VESICA patefacta, tunicae semper plus minus, pro gradu vehementiae et diturnitate morbi, in crassitudine auctae reperiuntur.

MEMBRANA investiens saepe aspectum reticulatum sive saccatum, fibrarum tunicae musculosae amplificatione effectum, monstrat.

TRACTUS muscularum ureterum vulgo admodum notabiles sunt, et ad finem eorum inferiorem, projectura glandulae valvularis plus minus, plerumque pro gradu difficultatis urinae emittendae, atque vesicae ipsius ante mortem irritabilitatis, perspicua est.

DE CAUSIS.

PARUM de causis, quae hoc vitium inducunt, cognoscitur, nisi quod senium in viris, uti mamma scirrhosa senectutem veteriarum, infestat.

LUXUS, ebrietas, et Venus nimium culta, actionem vasorum partis, quam voluit natura, validiorem, unde tonum in senio amittunt, ciendo, minus directe hoc malum arcessere valent.

CREBRAE affectiones inflammatoriae urethrae, partiumque vicinarum, usus frequens injectionum stimulantium, ictusque injuriaeve perineo illatae, actionem inflammatoriam glandulae directe impertiendo, possunt vitium, de quo sermo versatur, inducere.

FRIGUS corpori admotum, sanguinem a summa cute in organa interiora et penetralia corporis depellendo, eundem fere potest praestare effectum.

MORBUS aliquando quoque alvo astrictae restringiatur, unde, praeterquam quod haec arcto cum vitio locali nexu jungitur, sanguinis venosi reditu libero impedito, congestio fortasse vasorum ipsius glandulae inducatur.

DE DIAGNOSI.

MORBI, quicunque hujus signa facillime confundi queant, hi sunt: Ischuria Renalis, Strictura, et Calculus.

IN amplificationem Prostatae a caeteris urinae organorum vitiis dignoscendo, exploratione per digitum in rectum immissum, nisi quando malum tertium tantummodo plectit lobulum, multum confidere licet.

AB Ischuria Renali etiam dignosci potest, ab aegro ipso, dum adhuc urinam excernere, etiamsi per copiam uno quovis tempore parvam, valet, solita quantitate, intra horas viginti quatuor, emissam; itemque, postquam urinae fluxus omnino obstructus fuerit, tumore tenso, limitem definitum habente, per vesicam supra pubem formato; nec non urinae profluvio, immissa canula, facto.

HUNC inter morbum et Stricturam internos-

cere valemus, ex aetate proiecta qua impedimentum primum accidit; et ex eo, quod cereolus chirurgicus, nihil obstante, per septem circiter pollices in urethram penetrare queat, quum repente impeditur; dum catheter rite curvatus, parum vel nihil obveniente, in vesicam transire potest.

INDICIA Prostata tumida exorta a symptomatis Calculi Urinarii discernere in promptu est, ab impedimento introitus specilli in vesicam, et absentia sonus istius qui aures adeo perstringit, quando specillum in calculum impingitur; denique ab eo, quod, quanquam sanguis haud raro in morbo Prostatae, post equitationem aut in curru gestationem, profunditur, attamen dolores motu ipso non augentur, dum in calculosis, a causa eadem, dolor in modum fere intolerandum intenditur.*

* Tumores item nonnunquam a superficie vesicae interna excrescent, symptomata iis Prostatae amplificatae adeo similia edentes, ut non nisi ex sede diversa interstingui possint; neque multum, revera, ut discernantur, refert, quoniam quem huic vitio inservit curationis, illi quoque vulgo haud male convenit.

DE PROGNOSI.

DUM stadium incipiens adhuc adest, cum aegroti constitutio haud fracta fuit, si lobulus tertius non laboret, neque sit ulla in vesicam projectura valvularis eminens, morbum, cura summa et attentione, vel sanari vel saltem impediri posse in decursu, sperare licebit. Quando tamen morbus plene formatus est, quaecunque adfuerint indicia fausta, quomodo prognosin edamus felicem, magnopere cavere oportet.

QUUM vitium aliquamdiu perstiterit, lobulusque tertius amplificari inceperit, aegerque aetate proiectus sit, et vesica facile irritanda, spes sationis ad prostremum perfectae multo minor erit, et ad ea p[ro]ae caeteris remedia confugiendum medicis, quae morbi incrementum aut impedire aut prohibere potuerint.

Si malum ad stadium secundum pervenerit, et

glandula, in media praesertim parte, adaucta sit, si vesica admodum excitabilis, et crebris actionibus spasmodicis opportuna, aegerque senior fuerit, habitusque fracti, nulla spes erit, nisi angores aegri mitigandi, signaque urgentia compescendi.

DE RATIONE MEDENDI,

IN morbo, de quo agitur, tractando, medentis consilia, stadio morbi a progressa exempli historia discendo, et indagatione signorum praesentium accurata, regenda erunt. Ex usu, igitur, curatio ad ea remedia quae ad morbum, in stadio priori sive incipiente, tollendum, sufficient, et ea quae in stadio secundo sive provectione adhibenda sunt, spectabit.

IN priori, igitur, stadiorum tantummodo, sanationem appropinquare sperare fas est ; et haec ta-

libus modis aggredienda est. Alvis aegri imprimis bene solvatur ; ad hoc, medicamenta mitissima et minime stimulantia sunt adhibenda, et horum omnium maxime eligenda sunt enemata emollientia. Si tamen haec minus efficacia videantur, oleum Ricini, parvas salium mediorum portiones bene dilutas, aut pulverem Rhei, tuto adhibere licet. Alvo ita bene depleta, sanguis libere e lumbis aut perineo, per hirudines vel curbitulas cruentas, abstrahi debet. In aegro pleniore, unam sanguinis detractionem copiosam e brachio praemittere licet, antequam ad locales depletiones confugiatur. Sanguinis missioni statim succedere debent enemata opiate, ususque pulveris Ipecacuanhae compositi, aliorumve mitium narcoticorum internus. Diaeta tenuis anti-phlogistica praecipi, aegerque ipse in lecto contineri, debent ; omnesque rationes irritationis sedendae usitare decet ; balneumque tepidum quotidie adhibendum est.

TALI curatione adhibita, ait HOME, se complures aegrotantes sanitatem recipere cognovisse,

postquam etiam lobulus tertius mole augescere inceperat.

TALIA, tamen, exempla perpaucā sunt, et postquam morbus aliquatenus processit, ullis, qualibus hactenus pollet medicina, remediis insanabilis evadit; nisi a chirurgia spem salutis peti liceat.

LIZARS, anatomicus et chirurgus celeberrimus, excisionem Prostatae, quum tumefactione chronica afficitur, nuper proposuit; et operatio ab illo proposita facillime *in cadavere* perfici, et tota glandula sine laesione magna urethrae omnino extrahi, potest.

QUATENUS, vero, *in vivo* homine, cui Prostata multum fuit amplificata, bene cedat, nondum constat; tamen quondam horrendus rerum aspectus, quem aegro contemplandum est, ubi vitium suum remediis lenioribus cedere nescit, in quibusdam suaderet experimentum etiam periculosum, cui quidem multi se subjicere neutiquam recusarent, item cito dijudicatam fore sperandum est. Si

revera habilis comperta fuerit operatio, non solum medici, sed omnes gratias summas illi, qui proposuit, habebunt. Satis, tamen, in aperto erit, operationem tum solummodo adhiberi posse, quando lobulus tertius nondum amplificatus est. Talem operandi rationem LIZARS suadet.

AEGER in mensa, eodem positu ac in Lithotomia, ponendus est; et specillum in vesicam immittendum, et ita tenendum, ut antrorum Glan-
dulam Prostatam protrudat. Incisio in parte comprehensa semilunaris, qualis a CELSO in Li-
thotomia praescribitur, facienda est, a tubere ossis
ischii alterius ad tuber alterius pertinens, cuius
aspectus convexa ad symphisin pubis spectabit.
Fines sive cornua hujus incisionis paulo infra
tubera ossium ischiorum pervehenda sunt, inter
haec et anum, ut operatio reliqua liberius per-
ficiatur. Haec prima incisio, cutem telamque
cellulosam diducat, oportet. Operator, situm
bulbae urethrae animo respiciens, adhaesionem
fibrarum sphincteris ani ad acceleratores urinae
dividere debet, deinde fibras levatoris ani utrius-

que lateris, ab hoc loco deorsum ad fines primae incisionis semilunaris, adeo ut Glandula Prostata plane in conspectum detur, quae, tamen, diducendo Rectum per unam alteramve scalpri incisuram, multo magis patefit. Haec incisio musculos transversos perinei quoque dividit.

PROSTATA jam plene exposita, uncus inserendus est in unum lobulum latusve glandulae, quae cum cura a collo vesicae parteque prostatica urethrae dissecanda est; idemque ab altero latere, incisione superne deorsum pervecta, faciendum. Nulla per digitos laceratio aut avulsio, sed incisurae rectae scalpello, in hac operatione, adhibenda erunt.

GLANDULA morbosa sublata, specillum extrahi, catheterque ex gummi flexibili immitti, debent. Vulnus per tres suturas, unam in centro, unam utroque latere, committendum est. Aegrotus dein in lectum imponatur, et opiatum sumat. Catheterem ex gummi elastico in vesica relinqu, donec urethra sanata fuerit, neque educi oportet, nisi ut purgetur, si quando obstructus sit.

SI, tamen, operatio respuatur, morbusque ad stadium secundum pervenerit, ad symptomata urgentia mitiganda, cruciatusque aegrotantis sublevandos, praecipue respiciendum erit.

AD hoc, igitur, urina saepe educi debet, quoni-
am pressura, quam parti morbosa infert, cona-
tusque vehementes vesicae muscularumque ab-
dominalium ideo facti, ad morbum exacerban-
dum, doloresque aegrotantis augendos, plurimum
conferent.

De usu Catheteris.—Quaedam haud parvi mo-
menti impedimenta aliquando catheterem immitti
prohibitura videantur. Ex his primum obtinet
locum Spasmus Urethrae, conditione partium
praeter naturam mobili exortus. Alterum im-
pedimentum est Tractus Urethrae Obliquitas,
amplificatione lobulorum Prostatae lateralium ab-
normi effecta; ob hoc, enim, incrementum parum
aequale canalis utroque deinceps flecti visus est.
Lobuli tertii ad collum vesicae projectura impedi-
menti causa tertia existit.

IMPEDIMENTUM, a spasio urethrae exortum, superari potest, instrumento ex gummi elastico utendo, quod molle et laeve esse debet, itemque ad apicem rotundum et quam crassissimum meatus facile acceperit, ne in lacunis urethrae impliceatur. Hoc bene oleo illitum per urethram, sine stileto, mitti debet; si, tamen, ita ad vesicam usque penetrare nolit, stiletum rite curvatum per id intrudatur; sic, enim, minus inducetur irritationis et spasmi, quam si catheter educeretur, atque rursus stileto instructum immitteretur.

SI aeger huic urethrae vitio spasmodico opportunus esse solet, haud alienum erit suppositarium ex tribus aut quatuor opii granis Recto imponere, hora una vel altera antequam catheterem immittere conemur.

HAC difficultate superata, quae proxime sese verisimiliter sit objectura, meatus inter lobulos laterales obliquitas erit. Quum, igitur, Chirurgus hanc partem minus instrumento pervium sentit, apicem ejus ad unum latus deflectere debet, et si leni experimento facto, parum adhuc pro-

fecerit, ad alterum latus deflectat; et sic saepe voto potietur, ubi si instrumentum trusisset antrorum, non modo molimen frustra factum fuisset, sed etiam verisimilime damnum irreparabile partibus ipsis intulisset.

FREQUENTISSIMUM, vero, neque fortasse minime formidolosum, in cathetere immittendo, impedimentum est projectura lobuli tertii super vesicae collum, quae, praeterquam quod directe ingressui instrumenti obstat, interdum laxam urethrae membranam elevat usque ad veru montanum, adeo, quidem, ut lobulum amplificatum et veru montanum fere in contactum perducat, cavumque inter ea praeter naturam multo profundius reddat; pars meatus prostatica, quoque, ideo longior fit, et levis hujus partis curvatura naturalis, vesica quasi in tumorem elevata, multum augetur.

AD haec impedimenta superanda, catheter adhibendus, plurimum versus apicem praecipue, curvari, et pollicibus tribus quatuorve longitudine solita longior esse debet. Hic immitten-

dus est, apice semper secus urethrae superficiem superiorem truso, et circa pubem circuitu subito pervehendus. Si apex, nihilominus, cavo, inter partem eminentem et veru montanum, impliceatur, curvatura, uti primum a HEY Leedensi suasum est, stiletum ex parte educendo, augeri queat; vel si hoc etiam non sufficiat, catheter, uti HOME jubet, linea horizontali vel dextrorum vel sinistrorum immittendus est; et quum apex ad veru montanum pervenerit, manubrium, circuitu gradatim facto, dum adhuc movetur apex, sursum verti debet, et ita instrumentum in spatium lobulos laterales inter et medium dirigatur, ubi nil ingressui obstat, et nil opus est quo in vesicam perveniat, nisi ut manubrium deprimatur.

SI haud parum difficile fuerit instrumentum immittere, in vesica relinqu debet, ostio per corticem aut ligneolum obturato, itemque affigi decet, vel per taeniae habenulas, femoribus aegri ligatis, vel, quod melius convenit, fascia ad formam literae T more solito admoveri potest, fissura reflecta, unde penis exeat, et laqueo supra et infra

hanc fissuram taeniae habenae adligari possunt. Catheteris in vesicam plene missi, quod exstat, omne abscindi debet; quum, enim, ultra os urethrae eminet, facile flectitur, frangitur, aut e vesica eliminatur, inter spasmos vehementes quibus saepe viscus illud plectitur.

FORAMINA in lateribus instrumenti patula esse debent, quo minus muco aut sanguine obstruantur. Ad hoc, omnibus in exemplis, respicere oportet; nonnunquam enim adeo viscida urina est, ob copiam humoris tenacis secreti supra memorati, ut si foramina minora sint, ne guttula quidem una elabatur.*

SED quanquam haec omnia ita praecaveantur, catheter saepe oppilatur, et opus est extrahere, ut purgetur. Frequentiam extrahendi a rebus fortuitis pendere oportet; nunc semel in hebdo-

* Foramina quoque ampla alteri praeterea proposito inserviunt; nam interdum parvuli calculi in ea accipiuntur, et e vesica extrahuntur, instrumentum solummodo educendo unde causa alia irritationis auctae saepe evitatur.

mada sufficit, nunc quotidie instrumentum mutare
necesse est.

QUUM catheter sine magno dolore aut opere
intromitti potest, subinde tantum, pro copia
urinae secretae, et copia quae simul sine irrita-
tione contineri queat, immittere opus erit.

SI, vero, immissio instrumenti, ejusve in vesica
remora, ingentem efficiat irritationem, quoniam ita
morbus multum intenditur, cogitandum erit an-
non melius expedit vesicam a Recto perforare,
et canulam ex gummi elasticō, donec proclivitas
ad irritationem se remiserit, in apertura relin-
quere.

INFLAMMATIO, quae per morbi decursum ac-
cedit, topica sanguinis e lumbis, perineo aut mar-
gine ani detractione, semicupii usu, enematibus
emollientibus, aliisque remediiis, quae laudantur in
stadio priori, superanda est.

AD irritationem sedandam multa proposita sunt
remedia, quae deinceps recensebo.

De Narcoticis.—Hujus generis remedia omnium efficacissime sublevamen aegro afferunt. Praeparata ex Opio, Hyosciamo Nigro, Humulo Lupulo, Papavere Albo, vel Conio Maculato, aut Lactucarium, prout aegroto convenient, adhiberi possunt. Ex his unum nocte quaque secunda, vel fortasse noctibus singulis, praecipi debet. Ratio efficacissima ea exhibendi, per enemata, vel unum plurave pro suppositorio in Recto relictam, absolvitur. Lotio solutionis opii aquosae, ad proportionem opii semidrachmae, cum aquæ unciis duabus, in vesicam injecta, aliquando statim, cum ingens fuit irritabilitas, allevamen attulit; hoc, autem, praescriptum saepe potius uti corpus alienum agere, et irritationem intendere, videtur.

De Catharticis.—Ex his, uti jam dictum est, nulla nisi mitissima ingerenda sunt. Ad alvi tamen conditionem cura summa respicere oportet, quippe quae nunquam astringi permitti, sed potius laxa et facilis servari, debeat. Cum ad constipationem proclivis est aeger, Oleum Ricini, Pulvis Rhei, aut solutio diluta alicuius salium medium, usitari possunt. Sed in exemplis solitis, ex-

hibitio enematis ex aqua mera calida, aut decocto avenaceo, sufficere invenietur.

QUANDO opiatum aliquod ingeritur, inertiam alvi inde orituram, aperiens medicamentum siinul dando, optimo arceri reperimus. Ideo una duaeve pilularum Rhei compositarum Pharmacopaeiae nostrae, cum anodynō sumptae, facilem alvi dejectionem aegro die postero praestabunt, ubi aliter alvus non nisi cathartico valido solvi potuisset.

De Tonicis et Astringentibus.—Haec in vitiis organorum urinariorum vetustis multum usitata sunt, et, revera, cum beneficio quodam uti pro tempore videretur, in exemplis Prostatae incrementi, ubi secretio muci morbosi magnopere scatet. Arbutus Uvae Ursi, sub forma foliorum pulveris, per portiones a granis viginti ad sexaginta, ter quaterve in die data, laudibus haud parvis elata est. Tinctura muriatis ferri a guttis decem ad viginti bis in die data, ususque lavationis maritima, morbum aliquando morari videntur; hoc, autem, plerumque ita fit, cum morbus indole struosa instruitur.

De Stimulantibus et Contra-irritantibus.—Vesicatoria, in hoc morbo adhibenda, effectu cantharidum proprio in collum vesicae prohiberi videntur. Sed WILSON ait, ea perineo apposita, et, antequam cantharides absorbeantur, sublata, in irritatione interna sedanda profuisse. HUNTER exemplum tradit, ubi setaceum in perineo tumorem imminuit, et irritabilitatem vesicae temperavit; sed, parte sanata, symptomata redierunt, et quanquam iterum impositum fuit setaceum, beneficia pristina haud percepta sunt. Ex effectu mirabili Iodinae, in Bronchocele aliisque glandularum tumoribus quibusdam curandis, spes fuit nonnullis eam Prostatam amplificatam quoque sanaturam esse. In quibusdam, igitur, exemplis, ejus periculum factum est; sed, quatenus ipse novi, sine ullo beneficio diurno. Sub forma tincturae, per portiones gutterum decem aut quindecim bis terve in die dari, vel unguenti semidrachma in perineum mane et vespere inficari, potest.

De Diureticis.—Hoc remediorum genus, si

modo perite adhibitum, in signis gravioribus sublevandis multum prosunt.

JAM supra adnotatum est, ubi irritatio summa adest, accumulationem muci tenacis item multum augeri, et urinam parcissime secerni : quanquam, porro, ultra harum conditioni alteri causa sit, dictu difficile est, tamen saepe reperimus, una sublata, alteram quoque tolli, vel saltem magnopere allevari. Quum, igitur, Arbutus Uvae Ursi spem medentium fefellit, cum opium et caetera sedantia irritationem compescere desierunt, aut aegro parum convenientia, diuretica multum proficere invenientur ; secretio enim urinae aucta, materiam tenacem et acrem in vesica haerentem diluendo, et ejus excretioni favebit, et, dum in vesica moratur, minus irritantem reddet. Praeterea, haud alienum fortasse erit adnotare, fluxum urinae auctum aegro ipsi valde placere, cuius quidem attentione fere omnis plerumque in copiam quam excernit intenditur.

HUJUS generis medicamenta maxime eligenda sunt, Spiritus Etheris Nitrosi, Radix Scillae Ma-

ritimae, et Folii Digitalis Purpureae. Horum duorum actio, compositione cum Hydrargyro, praecipue ejus submuriate, admodum augetur.

UBI digitalis nil mali secum affert, caeteris eo fortasse anteponenda est, quod nempe, praeter effectum suum valde diureticum, ob vim sedantem bene notam, in irritatione temperanda, et febris symptomaticae incitatione devincenda, plurimum valeat.

De Diluentibus et Demulcentibus.—Ista liberlime in stadio proiectiore, saltem ubi catheter adhibetur, praecipi queant, et rebus se ita habentibus, magna irritatione urgente in actione diureticorum promovenda, plurimum prosunt. Sed in stadio incipiente, ubi urina difficulter excrenitur, etiamsi nondum catheter postuletur, usus multi humoris, cujuscunque generis, fortasse alienus erit, quia, vesicam ad functionem suam saepius ciendo, ad morbum exacerbandum conducet.

De Diaeta et Regimine.—Diaeta nutriendis esse debet, sed omni re califaciens aut acri vacua.

Jusculum gelatum ex pedibus vitulinis, Maranta Arundinacea, Sago, Panado, et similia, cibus optimus atque tutissimus erunt. Decoctum hordeaceum, aquam in panem tostum infusam, lac lacticisque serum, pro potu adhibere licet; sed vina, cerevisiae, spiritusque distillati, omnino prohibenda sunt, vel, si unquam opus fuerit, quam parcissime concedenda.

ÆGER quam tranquillissimus teneri, et quam maxime potest in lecto decumbere, debet; pro exercitatione, ambulatio aut in curru gestatio, sed neutiquam equitatio, praecipi queat.

DENIQUE, cura summa ab aegro ipso, et attentione sedula a medente, in remediis supra traditis perite administrandis, adhibitis, vita, quae aliter inter miserias et cruciatus traheretur, nonnihil magis toleranda, neque fortasse omni solatio vacua, reddi possit.

FINIS.

